

# Aet eo Jean-Do Robin war-du e gornôg...



**Gant kalz a c'hlac'har meump klevet e oa aet Jean-Do kuit d'an 31 a viz Genver 2021. Lod ac'hanomp a zo en em gavet emzivad(ez) hiviziken. Ur stourmer birvidik ha taer a oa anezhañ ; ur skouer evit lod vras ac'hanomp koulz lâret.**

Jean-Do Robin, o tistagañ ur brezegenn dirak milieroù a dud e Roazhon, e 2003.

**g**anet e Rostrenenn e 1956 en ur familh a renk izel, en doa klasket a-hed e vuhez ober al liamm etre e garantez evit yezh e vro, ar brezhoneg en doa klevet tro-dro dezhañ e-doug e vugaleaj gant e vamm-gozh, hag e stourm evit ma vije bet muioc'h a reizhed hag a ingalded sokial.

Ouzhpenn ur c'haner hag ur c'helenner eo bet Jean-Dominique Robin, ur stourmer politikel ivez. Perzh e oa bet eus ar Yaouankizoù Marksour-Leninour (JCMLF) ur strollad liammet gant ar PCMLF, d'ar c'houlz ma oa studier war an Istor e Roazhon 2. E 1973 e enebas ouzh al lezenn Debré a redie ar baotred da vont d'ober o c'hoñje abretoc'h hag eñ da gemer penn un stropad liseidi e-kerzh manifestadeg Gwengamp. Bet e oa fiziet ennañ raskrid al levrig stag ouzh embann *Bro-Dreger VI - Kanaouennoù Koñskried* gant Dastum Bro-Dreger. Kalzik a stourmoù all en doa kemeret perzh enno da harpañ stourmoù labourerien ar Joint-Français e Sant-Brieg, pe reoù Doux Pedernezh c'hoazh.

Goude bezañ desket brezhoneg dre

gentelioù noz e tivizas tremen e genstrivadeg skolaer. E 1982 e teuas da vezañ skolaer kentañ an hentenn divyezhek bublik e skol Savidan e Lannuon.

E garantez evit ar brezhoneg a vountas anezhañ da vont da skolaer, unan eus ar re gentañ e Breizh er bloavezhioù 80 en hentenn bublik. Ne zilaoskas ket ar stourm avat hag en em lakaas, asambles gant re all, da stourm en un doare pennek betek tapout digant ministrerezh an deskadurezh an DEUG brezhoneg e 1989.

Estreget e vicher en doa lakaet nerzh e-leizh da vuheziñ Unvaniezh ar Gellennerien Brezhoneg (UGB) ma oa prezidant anezhi. A-drugarez dezhañ e oa bet sikouret kalzik ar skolaerien yaouank. Reiñ a rae kentelioù brezhoneg a-youl vat e-kerzh stajoù KEAV, ma plije dezhañ rannañ e ouiziegezh diwar-benn brezhoneg Bro-Dreger ha Kerne-Uhel pe c'hoazh ar mod da implij kanaouennoù da zeskiñ pe kelenn gwelloc'h hor yezh.

Rak ur c'haner ampart a oa Jean-Do ivez. N'en em zispartie james diouzh e zaou gomper, Louis-Jacques [Suignard] ha Klaod [an Intañv] da lakaat an dud da zañsal a-hed an noz.

Kalz a vefe da lâret diwar-benn e varregezhioù pedagogel, an dafar en doa fardet koulz evit ar skolaerien hag evit ar vugale en ur gemer perzh e bodad skiantel Ti Embann ar Skolaerien.

Bet bez-prezidant Kuzul Sevenadurel e-pad un degad bloavezhioù mat e hadas e brederouriezh pedagogel da zifenn, brudañ ha skignañ hor yezh. E 2003 e oa e penn aozadur ar vanifestadeg veur evit

ar brezhoneg bet dalc'het e Roazhon hag a vodas tro-dro 15 000 den.

Etre 1992 ha 1995 a oa bet heskinet kalz a Vretoned gant polis ha justis Bro-C'hall evit bezañ roet bod da stourmerien ha stourmerzed Bro-Euskal ETA (Euskadi Ta Askatasuna). E Bro-Dreger e veze alies Jañ-Do e penn ar c'homiteoù skoazell.

E 2008 en doa krouet asambles gant mignoned all klub paledoù kentañ Breizh-Izel, ar PKK, Plankennoù Koad Kawan hag a ginnig daou gonkour bep bloaz.

Abaoe ma oa aet war e leve e talc'he gant stourmoù liesseurt 'vel hini ar bobl palestinat rak Jañ-Do bet prezidant AFPS Bro-Dreger a oa ur stourmer stag e dreid ouzh douaroù Kerne-Uhel ha Treger. Ken lemm e oa e deod hag e bluenn, koulz e galleg hag e brezhoneg. Plijout a rae dezhañ reiñ e soñj diwar-benn direizhderioù ar bed : ar chase, ar brezhoneg, ar skolioù, feulster ar polis, labourerien skarzhet gant Nokia Lannuon. Met ivez rannañ gant e vignoned ar pezh a entane ar muiañ anezhañ : pesketa, c'hoari paledoù, liorzhañ, pe c'hoazh an imboudiñ rak un imboudet ampart a oa anezhañ. Hag e-se en deus imboudet forzhik spered stourm ar brezhoneg e penn hag e kalon an dud yaouank.

Ra vezo ruz da ved dit, Jean-Do...

Lus Chauveau

